

[Augsburg], 9. Dezember 1560

An Joachim Camerarius d. Ä.

BSB, Clm 10370, Nr. 237.

Clarissimo viro, D. Ioachimo Camerario etc. Domino et amico suo colendo. Leipzig. Herren Camerario.

S. Cum post datas heri ad te literas, Clarissime vir, hodie se dedisset occasio filij tui commendandi: Cyprianus hoc responsi tulit, D. Camerarium ita commendatum esse Huldricho Fuggero, et merito quidem suo, vt si quid petierit ipse, repulsam minimè sit latus. Quòd si nullum extaret in se meritum tuum, tamen hoc se vel excellenti eruditioni tuae vel suae erga te benevolentiae libenter esse tributurum. Res igitur in eo versatur, ne tu graueris petere quid velis. Quod petieris, si facta dictis responderint, quod fore confido, id impetratum feres. Depones igitur subrusticam istam verecundiam, vel me autore, qui sum ab omni parte multò te rusticior, infinito verò interuallo et indoctior et imprudentior, libereqüe profitebere, quanto Fuggeri beneficio tibi sit opus. Amari te ab eo et magni fieri, οὐ κωμικὸς, ἀλλὰ οἰκιακὸς μάρτυς esse possum. Et ipse id apud Fuggeros sum expertus, eos amare verecundiam, malle tamen, si quem norunt et amant, quicquid opus fuerit, sine intercessoribus à se peti, ne hominem inferioris notae praestanti viro praetulisse videantur. Evidem prēudio aliquid spatij intercessorum, antequam tuae literae ad nos perferantur. Sed non puto ita constrictum esse filium tuum, vt mensis vnius atque alterius expectatione circumueniatur. An patroni liberalitas tuam petitionem anteuerterit, ignoro. Neque enim sum arcanorum conscius, eoqüe beneficio fruor, quod ab Archelao petijsse fertur Euripides. Vale atque ignosce et occupato et valetudinario. 9 Decembris 1560.

Hiero[nymus] Wolfius
Tuus.